

Paul un Emma un ehre Frünn'

Lex 6 - Inköpen

In denn Bäckerlåden

- Paul un Emma: Taching!
- Verköpersch: Tach, wat bruken ji?
- Paul: Ik bruk ein Fienbrot.
- Verköpersch: So in't Stück orrer in Schiewen schnäden?
- Paul: Sei köenen dat giern schnieden, åwer nich so dünne Schiewen, bitte!
- Verköpersch: Dat geiht klor. (*schnitt dat Brot, dreiht sik üm un kiekt Emma an*)
- Emma: Ik mücht giern de lerdbeertort hier vörn.
- Verköpersch: Giern, ik hål mål 'n lütten Karton un pack ehr di in. (*kümmt wedder un packt de Tort in*)
- Emma: Un denn bruken wi noch fief Semmeln, an'n leifsten twei mit Mohn, twei mit Sesam un ein mit Küörn.
- Verköpersch: (*packt de Semmeln in ein Popiertüt un tippt de Tåhlen in de Kass*) Dat måkt denn teihn Euro föfftig.
- Emma: Hebben wi nix vergäten, Paul?
- Paul: Ik glöf nich. Un süss kåmen wi wedder. (*Gifft de Verköpersch 15 Euro*)
- Verköpersch: Vålen Dank un vier Euro föfftig trüch. Denn wünsch ik juuch gauden Appetit.
- Paul un Emma: Vålen Dank un tschüssing!

In denn Kledäschenlåden

Paul un Emma: Gauden Dach!
Verköper: Taching tausåmen! Kann ik juuch helpen?
Emma: Ik glöf nich, wi willen bloots ein bäten kieken.
Verköper: Kiekt juuch giern üm un wenn ji Frågen hebben, mellt juuch – ik bün hier bi de Kass.
Paul un Emma: Danke – måken wi!
Emma: Kiek mål Paul, is dit Kleed nich schmuck?
Paul: Du hest doch all twei Sommerkleeder!
Emma: Åwer ik heff noch kein Kleed in hellblåch.
Paul: Dat stimmt. Wenn du dat Kleed lieden machst, kannst du dat ja anprobieren.
Verköper: Dat Kleed hebben wi ok noch in rosa un in gäl.
Emma: Danke. Åwer ik mach hellblåch un probier dat nu.
(*treckt dat Kleed an un dreiht sik vör denn Spiegel*)
Verköper: Dat passt!
Paul: Dat steiht di gaut! (*lütte Paus*) Kiek mål, wat ik funnen heff!
(*wiest Emma witt-blåge Ringelstrümp un ein düüsterblåge Bux*)
Emma: Oh, de Bux gefällt mi. Hest du Lust, de antauproberen?
Paul: Ach, ik weit nich. Hüt nich. Wi koenen ja tauhus von dat Kleed un de Bux vertellen!
Emma: Gaude Idee! Ik treck mi nu wedder üm.
Verköper: Na, machst dat Kleed lieden? Dat passt di gaut!
Emma: Ja, villicht kåm ik morgen wedder mit mien Mama.
Verköper: Giern. Bet morgen denn.
Emma un Paul: Jå, vålen Dank un tschüssing!